

Pharmaniaga akan bekal 12 juta dos vaksin Covid-19 kepada kerajaan

By **Bernama** - January 26, 2021 11:01 PM

128
Shares

76

49



Pharmaniaga akan membekal, mengendalikan proses pembotolan, mengendalikan logistik dan pengedaran vaksin CoronaVac ke hospital, klinik serta kemudahan lain yang ditetapkan kerajaan.

SHAH ALAM: Pharmaniaga Bhd (Pharmaniaga) akan membekalkan 12 juta dos vaksin CoronaVac Covid-19 kepada Kementerian Kesihatan, susulan permeteraian perjanjian oleh kedua-dua pihak hari ini.

Perjanjian itu dimeterai Menteri Kesihatan, Dr Adham Baba sebagai mewakili kementeriannya dan Pharmaniaga diwakili Pengarah Urusan Kumpulannya, Zulkarnain Md Eusope.

Zulkarnain berkata, Pharmaniaga menjangka bekalan pertama CoronaVac daripada Sinovac Lifesciences Co Ltd (Sinovac) dari China diterima bulan depan dan vaksin itu akan tersedia kepada rakyat Malaysia pada akhir Mac atau awal April.

"Pharmaniaga berbesar hati dengan kepercayaan yang diberikan kerajaan untuk membekalkan vaksin kepada kemudahan kesihatan kerajaan. Kami akan mengendalikan proses pembotolan (fill and finish) CoronaVac serta mengendalikan logistik dan pengedaran vaksin itu ke hospital, klinik dan kemudahan lain yang ditetapkan kerajaan.

"Anak syarikat milik penuh kami, Pharmaniaga LifesScience Sdn Bhd (PLS) akan membotolkan CoronaVac di kilang Small Volume Injectable diperakui GMP dan Kesatuan Eropah yang digunakan semula bagi projek ini," katanya dalam kenyataan.

Beliau berkata, urusan logistik dan pengedaran akan dikendalikan Pharmaniaga Logistics Sdn Bhd (PLSB), yang memiliki pengalaman 26 tahun menguruskan pengedaran vaksin dan memiliki prasarana canggih untuk menyokong keperluan itu.

Memandangkan situasi yang belum pernah berlaku ini, Pharmaniaga turut meningkatkan aspek keselamatan dari segi logistik vaksin, kata Zulkarnain.

Pada 12 Jan lalu, Pharmaniaga memeterai perjanjian dengan Sinovac untuk mendapatkan bekalan besar vaksin yang akan melalui proses pembotolan di kilang berteknologi tingginya.

Perjanjian itu juga termasuk pindahan teknologi kepada syarikat berkenaan.

Zulkarnain berkata, Pharmaniaga berpuas hati dengan keputusan awal ujian klinikal tiga fasa yang dijalankan ke atas orang awam di Turki yang menunjukkan keberkesanan CoronaVac pada 91.25%.

"Pharmaniaga, KKM serta Kementerian Sains, Teknologi dan Inovasi mengadakan beberapa perbincangan dengan Sinovac mengenai keputusan ujian klinikal fasa tiga di Indonesia dan Brazil yang dijalankan menggunakan reka bentuk kajian berbeza, tetapi mengikut standard dan garis panduan ketat Pertubuhan Kesihatan Sedunia (WHO).

"Di Brazil, sebagai contoh, ujian klinikal dijalankan hanya ke atas kumpulan profesional penjagaan kesihatan. Pharmaniaga berpuas hati dengan keputusannya, terutamanya apabila CoronaVac merupakan satu-satunya vaksin dalam pasaran yang mengambil langkah berani sedemikian untuk menjalankan kaji selidik dalam persekitaran kumpulan mudah dijangkiti.

"Kami sangat yakin CoronaVac selamat, berkesan dan berkualiti tinggi bagi kegunaan rakyat Malaysia," katanya.

Beliau berkata, CoronaVac sudah didaftarkan dan diluluskan untuk kegunaan semasa kecemasan di China, Chile, Brazil, Indonesia serta Turki yang mana Presiden Turki, Recep Tayyip Erdogan dan Presiden Indonesia, Joko Widodo turut disuntik vaksin itu.

"Meskipun wujud perkembangan menggalakkan mengenai penggunaan CoronaVac, kita perlu mematuhi peraturan di Malaysia dan biarlah Bahagian Regulatori Farmasi Negara (NPRA) mengkaji semula surat dan dokumen berkaitan vaksin itu yang dihantar baru-baru ini.

"Tertakluk kepada kelulusan NPRA, insya Allah kami akan menyediakan vaksin untuk rakyat pada akhir Mac atau awal April."

Beliau berkata, sebaik saja CoronaVac berdaftar dengan NPRA, PLS akan menjadi pemegang pendaftaran produk dan pengedar eksklusif, yang diberikan kebenaran Sinovac untuk keluaran siap pasaran Malaysia yang dikeluarkan di peringkat tempatan atau import dari China bagi kerajaan dan sektor swasta.

Dalam makluman kepada Bursa Malaysia hari ini, Pharmaniaga berkata, PLS sudah menghantar permohonan untuk mendaftar dengan NPRA pada 19 Jan lalu.

Katanya, PLS menandatangani perjanjian dengan kerajaan bagi pembelian dan pengedaran COVID-19 Coronavac, SARS-COV-2 Vaccine (Vero Cell) Inactivated untuk dibekalkan ke hospital, klinik dan kemudahan lain di seluruh negara seperti diarahkan KKM.

"Pembekalan vaksin Covid-19 yang telah selesai tertakluk kepada pendaftaran dengan pihak berkuasa kawalan ubatan dan memenuhi semua syarat peraturan."

Katanya, perjanjian itu akan berkuat kuasa hari ini dan dilaksanakan dalam tempoh setahun, tertakluk kepada penamatan lebih awal oleh mana-mana pihak yang gagal mematuhi obligasi atau selepas membuat perjanjian muktamad.

Pharmaniaga berkata, CoronaVac merupakan vaksin virus tidak aktif yang terdiri daripada zarah virus hidup dalam kultur dan kemudiannya hilang keupayaan untuk menghasilkan penyakit.

Vaksin jenis ini boleh dipercayai dan teknologinya terbukti sejak ditubuhkan 40 tahun lalu. Ia juga bersedia untuk digunakan tanpa perlu dicairkan.

Keadaan penyimpanan dan pengedaran vaksin ini antara dua hingga lapan darjah Celsius, iaitu suhu vaksin yang sama digunakan kemudahan sedia ada Pharmaniaga serta kemudahan penyimpanan di hospital dan klinik kerajaan.

128
Shares

76

49

Subscribe to our newsletter and get news delivered to your mailbox.